

那文毅公奏議

那文毅公西寧辦事大臣奏議目錄

附官階

卷十五

剿捕野番

卷十六

剿捕野番

籌辦善後

卷十七

搜捕餘賊

附議駁徐侍御條奏

敘績保薦

附恭報交卸

那文毅公西寧辦事大臣奏議卷十五目錄

卷十五

勦捕野番

官階

嘉慶十一年正月二十五日由伊犁戍所

擢授三等侍衛爲伊犁領隊大臣

嘉慶十一年三月二十日

擢調喀喇沙爾辦事大臣

容安謹按伊犁領隊大臣喀喇沙爾辦事大臣
各任均循例奏件故不贅錄

那文毅公西寧辦事大臣奏議卷十五

男
容安恭輯

勦捕野番

嘉慶十一年五月初六日

摺調西寧青海辦事大臣

容安謹按先是西寧辦事大臣貢公楚克札布
奏野番揣咱族番目尖木贊之姪克什搶劫蒙
古牲畜及堪布喇嘛牛隻

上命貢楚克札布甘州提督百祥帶兵勦辦雖獲連勝而
賊番仍未斂戢竟搶內地居民戕傷兵丁

上復命寧夏將軍興公奎統轄師旅貢公楚克札布叅贊

軍情仍未就緒

上復調長公齡爲陝甘總督統轄師旅以先公

擢調西寧辦事大臣奉

命叅贊軍務

嘉慶十二年六月十三日軍機大臣字寄奉

上諭興奎奏殲斃賊番二族現在差探進剿情形一摺此次興奎等查明貴德所屬卓色勒一族屢經做賊現又逃往他受族下與之聚合當卽派兵進剿該賊番等敢於佔住山頂公然抗拒實爲可恨經官兵分路直上不

能抵敵始行奔竄共追殺賊番一百餘名生擒三名奪
獲牛羊馬匹約計一萬有餘賊番經此痛勦挫其兇鋒
庶可稍示懲儆現在官兵探明賊番逃往何處自當乘
勝深入一鼓殄除但其餘安靜番族雖經興奎等向其
面諭令各安業不致滋事而此等大羊之性究恐無常
不可深信此時官兵追勦賊番步步深入仍當嚴防後
路或多設卡座廣爲巡邏總須聲氣聯絡加意防備方
可無慮其此次奪獲之牛羊馬匹既有萬餘卽當查明
失主分別給領如無失主承認卽作爲進勦官兵口糧
並備賞項至摺內稱前派都司邵能面諭尖木贊令其

縛獻賊首該番目佯爲應允迄今遠避不知去向風聞有糾約各賊番抗拒之勢等語尖木贊曾經賞戴翎頂非其餘番衆可比當此官兵查拏賊番之時並不出力報効轉敢糾約匪衆抗拒官兵似此背恩稱亂直係叛逆興奎等摺內祇稱其情同叛逆未免措辭失當已用硃筆改示矣該處番賊滋事旣係尖木贊爲首必當設法擒獲嚴行懲辦方可以懾服番衆且恐其糾約各族卽在後路滋擾興奎等探明該逆現在何處卽當迅速統兵進剿不可遲逾設兵力尙覺不敷不妨就近酌調以期聲威壯盛早就肅清長齡昨已陛辭出京於何處

接奉此旨卽著馳驛前往俟到蘭州後察探情形如賊番業已辦理完竣自毋庸再往會辦設或剿辦尙在費手卽當親自馳赴該處會同興奎等熟商妥辦現在那彥成應亦將次到彼伊任同叅贊當與興奎帶兵同辦貢楚克札布已放察哈爾都統伊侯那彥成到後同住數日詳細告知辦理情形卽著起程來京請訓赴任

嘉慶十二年七月十九日軍機大臣字寄奉

上諭長齡奏兼程馳赴蘭州接印督催續調各官兵迅剿賊番一摺據稱興奎等續調涼州洮岷甘州撤拉爾官兵三千名前往協剿此次剿辦賊番已逾三月尙在續

調官兵自係辦理未能得手等語前據興奎等奏剿辦三族賊番殲擒賊匪多名奪獲牛馬羊隻一萬有零似已辦有端緒今遲逾數月之久又經續調官兵迄未辦竣看來尙無把握貢楚克札布向未經歷行陣於軍旅之事本未嫻習興奎雖經從事戎行但未統率師干獨當一面恐於剿捕機宜亦未能深悉長齡曾經督兵剿辦教匪宣力行間那彥成亦曾帶兵打仗所有剿捕賊番一事自能斟酌會辦長齡馳抵蘭州後察探情形如興奎等在彼辦理此事並無未協卽著長齡那彥成二人幫同興奎妥爲經理貢楚克札布於那彥成到彼後

卽著起程回京請訓再赴察哈爾新任所有奏報之摺
與奎列名在前長齡那彥成列名在後若與奎在彼不
能得力卽著據實密奏將與奎撤回本任其勦捕事務
卽責成長齡那彥成二人專司辦理所有奏報之摺長
齡列名在前那彥成列名在後倘伊二人自揣辦理未
能裕如不妨奏明另請添派大員前往會辦以期迅速
集事惟是野番族類繁多此次督兵進勦祇須懾以軍
威令其實在畏懼將在逃賊目縛獻並探明朱八崖地
方將尖木贊拏獲治罪卽可撤兵亦斷無將賊番概予
駢誅之理長齡惟當酌量情形熟籌辦理俾邊境永臻

寧謐方爲妥善

嘉慶十二年七月二十四日軍機大臣字寄奉

上諭興奎等奏連次攻剿賊番及酌籌添調官兵各緣由一摺覽奏俱悉此次賊番在甘壩竹壩等處恃險抵拒經官兵節次攻擊殲斃賊番數十名餘賊狂奔肆竄看來已就窮蹙據摺內稱賊番等不過倚仗馬力善於登山涉險此外實無伎倆等語現在隨營馬隊官兵恐不甚得力雖有格布舍在彼帶領但僅伊一人督率未免太少現已另降諭旨由京揀派東三省曾經出師年力精壯技藝嫺捷之侍衛章京數名馳驛前赴西寧交與

奎等酌派領隊俾資得力俟勦辦賊番完竣即將該侍衛章京等留於彼處交長齡那彥成以營員補用倘該侍衛章京等到彼後軍務業已告蒞亦著留於該處以相當之缺補用至賊番尖木贊旣不能縛賊自効膽敢於揣咱等五族內挑出騎馬番子七百餘人預備抵當官兵卽屬叛逆必當痛加殲戮以示懲儆卽使該犯畏罪乞命投誠亦不得稍從寬宥此時長齡那彥成俱將次到彼惟當與興奎酌籌安辦以期永靖邊圉又據奏現在所帶之兵已有四千五百名除分撥外尙覺不敷請添調涼州兵一千名甘州兵五百名洮岷各營兵一

千名等語此次勦辦番賊原應厚集兵力懾以軍威以期一鼓集事著照所請辦理惟所稱撒拉爾回民情殷報効請將該土司挑備回民五百名調赴軍營一節殊可不必撒拉爾回民素性貪利並非誠心幫助官兵且亦難於駕馭竟當停其徵調仍諭以伊等情殷報効尙屬可嘉現經據情代奏已蒙俯鑒惻忱惟賊番勢就窮蹙此時大兵雲集卽日掃穴擒渠毋須復藉爾等協助且路途遙遠跋涉不易無庸整備聽調以示體卹其陣亡之把總馬希堯著咨部賜卹此外有無傷亡官兵並著查明咨部分別卹賞又據另片奏奪獲牛羊數目共

計十一萬有零除調取犒賞外俟軍務完竣飭令變價
歸入軍需項下報銷等語殊未得體此項牛羊若查問
事主給還恐該蒙古等不免以少報多希圖冒認轉致
不敷現在既交慶旻收管卽著該道員查明細數交長
齡那彥成先儘接濟兵食再酌賞軍營出力官兵如有
餘剩俟勦辦賊番事竣後傳旨分賞衆蒙古俾伊等共
知此項牛羊本應入官今格外施恩賞資伊等自必倍
加感激也

嘉慶十二年七月十八日

奏爲恭報馳抵平番並陳軍務情形事

臣自喀喇沙爾

交印起行後行抵哈密知有西寧用兵之事又於甘州接奉由興奎等轉行

諭旨蒙

恩令

臣

察贊軍務常卽兼程行走於七月十五日馳抵平

番平番去省不遠

臣

急欲細知蒙番情形因先期

與藩司蔡廷衡彼此知照均於是日齊到據蔡廷

衡將一切情形備細告知又於甘涼途次節接軍

營西寧道慶旻來信云連日大軍進剿屢獲勝仗

惟尖木贊於六月二十八日率領五族番衆悔罪

投誠情願隨營効力並呈獻牛隻忽於是日夜間

又復驚逃我兵連日窮追等語次日又來信云七月初九日據多爾才溝所安軍臺原派外委馬友等稟報忽有二三十賊番將軍臺馬匹鍋帳全行搶去並截傷兵丁二名賊番皆在沙溝一帶搶掠等語臣伏讀屢次

上諭均皆

飭令大兵必須齊集進剿務使軍威壯盛一鼓成功更須肅清後路最爲緊要今果後路糧臺被劫誠不出聖明所料仰見

皇上廟算如神洞悉軍務

臣

不勝欽佩之至現在續調甘

涼之兵恰過貴德前進

臣

卽飛飭涼州鎮吳廷剛

會同慶爇酌留一半在各臺往來巡邏其餘仍帶
赴大營隨征而興奎等已於大營內撥回兵丁四
百名慶爇又移調西寧兵二百名刻下聲勢連絡
賊番已去後路無虞可以請免

聖厪

上

兩三日內亦可馳到西寧貴德一路暫爲料理後

路督

臣

長齡不日計可到來容

臣

等先將一切事

宜通盤籌算計出萬全務於八九月下大雪以前

殊

甚是

可以撤兵藏事以仰慰

聖懷至

臣

屢獲重譴今蒙

聖恩成全俾同叅贊之任

臣

惟有竭盡血誠悉心贊理以

期仰報

皇上高厚鴻慈於萬一容

臣

到任後再行專差齎摺恭謝

天恩謹

奏

嘉慶十二年八月初一日軍機大臣字寄奉

上諭那彥成奏馳抵平番探報軍務情形一摺覽奏俱悉
那彥成於甘涼途次節據西寧道慶斌稟稱大軍進剿
番賊屢獲勝仗惟尖木贊於六月二十八日率領五族
番衆悔罪投誠忽於夜間又復驚逃並據多爾才溝所

安軍臺外委稟稱賊番二三十人將軍臺馬匹鍋帳全
行搶去戳傷兵丁二名等語賊番尖木贊旣不能縛獻
賊匪自効乃率領五族投誠旋又驚逸並搶劫後路糧
臺戕害官兵可恨已極該犯逞其狡猾伎倆甘心叛逆
必當迅速擒獲明正刑誅卽使該犯果誠心乞降亦不
得稍從寬宥此時那彥成諒已早經到彼長齡計亦馳
抵該處惟當與興奎熟籌妥辦以期永靖邊圉又據摺
內稱務於八九月下大雪以前撤兵藏事等語所見甚
是番衆族類繁多良莠不一此次勦辦賊番祇須將滋
事不法之徒加以懲創並將賊目尖木贊擒捕就獲按

律辦理俾番衆震懾軍威卽可撤兵了事非必欲掃穴
駢誅將番族概行殲洗若辦理稍有遲逾或致大雪以
前尙未竣事豈不日久稽延徒煩兵力興奎等惟應起
緊勦辦尅日撤兵歲事方爲妥善至該處勦辦情形與
奎等於前月初二日奏報後直至二十四日始續有奏
報且此次那彥成所奏尖木贊投誠後忽又肆劫之處
均未據興奎等詳悉具奏殊屬疎畧朕屢念軍務情形
無時或釋著長齡那彥成到彼後先將勦辦大概情形
據實具奏此後並著每隔數日奏報一次以慰厯注

嘉慶十二年八月初六日軍機大臣字寄奉

上諭長齡奏趙程前赴西寧並陳軍務情形一摺據稱剿辦賊番自進兵以來節次奏報殲獲甚多所獲牲畜計十一萬有餘覈對人數賊數多寡懸殊其中恐不能分別良莠轉致正賊遠颺無辜被戮等語所奏甚是恐不能免此弊前經節降諭旨令興奎等查明番族實在滋事不法者按名懲辦懾以軍威便可撤兵了事原無將番衆概予誅之理况番族窮苦多疑素以牲畜爲命今奪獲牛羊馬匹至十餘萬之多恐失業番民因餬口無資難保不於藏事撤兵之後又復潛至蒙古地界乘間劫掠彼時又須調兵緝捕輾轉剿辦伊於何底且番

族性情剽悍言語不通若不設法安撫善良殄除兇暴
必致相率驚疑豈竟聚而殲洗兼之番境氣候早寒地
勢險峻亦不值疲勞兵力日久稽延此時那彥成早經
到彼長齡亦馳抵該處惟應與興奎酌量情形通盤籌
畫或於大雪以前暫緩進兵或可設法懲辦卽日竣事
之處總需計出萬全一勞永逸朕亦不爲遙制倘興奎
從前辦理未能妥協不可意存迴護至尖木贊先率五
族乞降旋又竄去一節已據那彥成奏及野番族類繁
多亦未必盡聽尖木贊一人指使但該犯膽敢叛逆自
應嚴緝重懲卽使悔罪投誠亦不得曲從寬宥一俟該

犯就獲後按律辦理庶番衆咸知斂戢不致伺隙滋擾
興奎等當相機籌辦以期永靖邊圉方爲妥善

嘉慶十二年八月初十日會同寧夏將軍興公奎

陝甘總督長公齡察哈爾都統貢公楚克札布

奏爲

臣

等馳抵軍營查明辦理情形並現在會籌勦撫

機宜事竊

臣

長齡前自蘭州拜摺後卽日起程於

前月二十九日起赴西寧與

臣

那彥成會晤卽由

貴德一路出口馳赴軍營行至多格賴瑪地方適

興奎貢楚克札布已由甘肅移師前來

臣

等相晤

後面詢辦情形並知興奎等現在派令副都統

格布舍提督百祥總兵蕭福祿游棟雲等帶兵分
路剿辦沙卜浪一族所有攻剿情形已由興奎等
具

奏查青海蒙番礮處蒙古王公等苦虐其下多有投入
番族之人因而勾引野番肆行搶掠以圖報復而
蒙古等懦弱無能惟憑官爲辦理屢年呈告請兵
未遂其願因卽引帶番賊入我大通地方卽犯

天朝邊界勢不能不動大兵伊等可藉消其積怨其實糊
塗野番並未知何爲內外不過惟利是圖向來辦
理番案不過陳軍番地示以兵威該番等震懾自

投呈獻賊即可撤兵完案然兵退賊來愈辦愈
甚今得仰蒙

皇上洞悉番情震赫

天威聲罪致討興奎等督師深入數月以來屢破番巢頗
有勦戮現在各族作賊之人紛紛逃竄又有官受
等二十餘族投誠歸命來營乞降事機尙屬順利
惟查各野番言語不同性情各異其愚蠢無知真
同羊犬是以每見官兵無論是勦捕何人卽施放
鳥鎗一經放鎗抗拒卽同叛逆雖經諄諄分別黑
白亦未必家喻戶曉至彼此旣經對仗牛羊牲畜

硃

丟棄滿山亦不得不向前驅奪是以所殺者未必
皆作賊之人而所獲者亦未必盡被劫之賊統此
案全局而論大兵進剿雖未能大加痛剿然軍威
壯盛屢次破巢馘醜已足寒賊番之膽此番撤兵
後或可暫時安靜是辦理得宜在此但番族以牲
畜爲生既未多除其顯惡已先亡其恒產將來不
能自活盜劫因而愈增是善後之難亦在於此至
沙卜浪一族向稱梗化近日竟敢收留散賊負固
抗拒自應加之勦辦以懾番賊而彰

國法惟刻下番地霜雪已降泉竭草枯此後天氣愈寒瘴

氣愈重人馬冲寒觸癘多致病傷因此化外無知之野番以致勞損官兵糜費

國帑實屬不值臣等斟酌情形與興奎主見相同倘該番族畏懼投誠卽當仰體

皇上好生之心准其悔罪縛獻正賊遵

旨速行撤兵告歲所有善後事宜容臣

等再爲悉心籌酌

以期益臻安善再撒拉爾回兵本未嫻習紀律誠如

聖訓難以駕馭然此次從事番地與前次辦理教匪時情形又有不同緣該回民等住居河州接壤循化亦

深畏賊番搶掠志切同讐今令隨同官兵勦捕番
賊無不爭先奮勇力圖報復是撒拉爾與野番互
結仇讐轉可作我屏籬亦遠勝於不能振作之蒙
古不堪驅使應請

旨仍將現在五百名留營勦賊俟軍務稍有頭緒卽當遵
旨先行撤回原處謹

奏

嘉慶十二年八月初八日會同寧夏將軍興公奎
陝甘總督長公齡

奏爲連日攻剿沙卜浪大族賊番並陸續投誠十餘族

番目事

臣

等前將勦滅竄賊並收撫降番情形具

奏在案查沙卜浪一族地近循化人數較多尋常最爲

兇狡且各族擊散賊番陸續逃往依附爲奸倚恃

地險人多敢爲抗拒實爲可惡

臣

等再四商酌務

將此族賊番痛加勦戮方足以懾衆族而申

國法

臣

等於七月二十五日自細麻岔拔營移駐甘壩

分路差探賊匪路徑形勢隨挑派總兵蕭福祿游

棟雲由噶楞雅哈一路進發百祥格布舍吳廷剛

由三阿一路進發博勒忠阿由循化一路探勦

臣

等由三扎灘一路將應據蕭福祿游棟雲稟於初

四日行抵什尖里幹遙見賊番佔據各山早有準備我兵相度地勢分路前進叅將張聯奎土司韓輝宗由右首山梁攻擊游棟雲帶同都司吳順由左首溝內直上蕭福祿帶同遊擊馬隆等由中路攻撲賊番各據險要不動適有撒拉爾數十人從陡崖盤上鎗斃賊番數名土司韓輝宗乘勢搶上山梁游棟雲之兵亦已撲進賊番不能兼顧立即亂竄滾崖跌斃數名殺斃十餘名賊番入溝奔跑又殺斃二十餘名酉刻收兵將殺斃賊番首級內認有賊目窩常旦木正首級一顆並奪獲牛馬羊

六百餘隻當卽分賞官兵撒拉爾以示獎勵至次日賊番仍在汪科合大山屯紮我兵正在齊隊進攻之時突有賊番百餘人在右首山梁埋伏直衝兵隊蕭福祿等分兵兩路攻壓都司吳順帶領循化營保安營官兵同撒拉爾繞至山梁奮力攻壓賊番且戰且行我兵鎗礮齊發擊斃賊番甚多都司吳順奮勇撲入賊隊中鎗陣亡土司韓輝宗等帶領撒拉爾鎗斃賊番數名將吳順屍身搶回本日擊斃賊番多名竟日攻打未暇割獲首級初六日百祥格布舍等依期到來因霧大雪深將營盤

暫紮初七日早賊番在沙卜浪溝林中施放鳥鎗
我兵仍分兩路進攻擊斃賊番數十名拏獲一名
適副將博勒忠阿之兵亦到在賊番後路攻撲鎗
斃賊番二名追至賊巢我兵鼓勇直前撲至土房
牆根拋擲火球燒死賊番十餘名殺斃九名沿途
追趕又殺賊番三名將各溝內藏匿賊番挨次搜
捕並收割麥田以絕賊糧一面由葉什冲寺追至
虹霧弄地方收獲牛馬羊二萬有餘我兵各路會
齊現皆佔據山梁扼要安營步步緊逼賊勢實已
窮蹙臣等一路大營於初二等日據循化番僧

昂質帶領投誠之卓色勒他受都受瓜什濟思滿
受剛咱他爾迭查那黑里沙占札干布魯目貫工
麻等十二族番目俱來投誠乞命臣等查各番族
內從前原有做賊之人亦有實在安分之族臣等
查其情形實出畏懼當卽面爲開導諭令務須守
分倘再有做賊不法之事定俱剿滅嗣後各該族
中有逃回之賊立時縛獻不得隱匿隨發給執照
同業經投誠之加咱等六族均行安插駐牧去訖
查沙卜浪賊番現在業極窮蹙如果始終抗拒自
應盡予誅除設此時能知畏懼縛賊投誠臣等再

當細心酌量仰體

皇上好生之仁准其歸命投誠著落獻賊正法以示儆戒
即可撤兵戡事此次帶傷陣亡官兵容俟查明咨
部謹

奏

嘉慶十二年八月初八日會同寧夏將軍興公奎
陝甘總督長公齡

奏

臣等接奉

硃批諭旨著將撒拉爾回民停其徵調欽此臣等伏查前
據該土司等呈懇回民與賊番接壤亦受其害義

切同仇情願出力

臣

等因其熟習地勢情形是以

准其所請一面具

奏一面咨調令由保安一路就近來營到營後卽令跟
隨前敵官兵打仗頗爲出力今臣等公同商酌此
刻該回民等正隨前敵進剿沙卜浪族似不便遽
爾撤回容俟剿辦稍有頭緒卽凜遵

諭旨將該回民等先行撤退酌量加賞令回原處謹

奏奉

硃批覽

嘉慶十二年八月二十七日軍機大臣字寄奉

上諭與奎等奏攻勦沙卜浪大族賊番情形並長齡那彥
成馳抵軍營會籌勦撫機宜一摺覽奏俱悉沙卜浪一
族素稱兇悍且敢收留散賊負固抗拒實屬可惡經與
奎等督兵分路進剿擊斃賊番數十名並奪獲牲畜二
萬有餘賊勢已極窮蹙其卓色勒等十二族亦俱震懾
軍威投誠乞命是此次督師懲創已寒賊膽該番族如
果始終怙惡自應上緊勦除倘已畏懼投誠縛獻正賊
卽當量加寬宥該處天氣早寒地勢險峻務於大雪封
山以前撤兵嚴事切勿日久稽延徒疲兵力至番族以
勿爲蛇足轉難收局矣
牲畜爲生現在奪獲之數過多將來該番衆不能自活

殊

此次兵威已振

必致盜劫愈甚長齡那彥成所論俱屬切實番衆滋事
肆劫其搶掠之贓自應盡數奪回若已悔罪投誠卽當
加以撫卹免致餬口無資所有節次奪獲牲畜於接濟
官兵口食分賞蒙古外其餘俱賞給降番仍諭以番衆
遠處邊隅旣知守分畏法卽蒙聖恩撫卹倘再越界滋
擾故智復萌必當調集官兵痛加誅戮不惟牲畜概行
入官並不能再邀寬典如此凱切曉諭庶使咸知感畏
其撒拉爾回民素性貪利而又難以管帶是以前降諭
旨令興奎等停其徵調今旣據奏該回民志切同仇業
經調集五百名前赴軍營協勦出力自不必復行撤回

著興奎等於事竣後擇其實在出力者保奏數人酌加獎勵所有奪回牲畜並著酌量分賞用昭恩賚又據興奎貢楚克札布奏派兵往拏尖木贊措置失宜懇請從嚴治罪一摺尖木贊原係種地納糧生番向來辦理番案多用伊爲線索其素性本屬狡黠此次勦捕賊番興奎等派員前往曉諭令其擒拏賊目尖木贊始而疑懼躲避嗣因通丁往喚尖木贊隨卽來營面見興奎等情願出力旋經引同官兵打仗追至六月十五日率同番衆潛回復於二十四日率領五族番衆投効並聲明前次因餘賊欲行搶害家口是以馳回照料後因幫貼烏

拉運送官糧約於二十八日在甘壩引路進剿沙卜浪
番賊屆時如期而至是尖木贊並無違逆情事與奎與
衆商議擬於剿辦番賊戴事再將尖木贊功過明白宣
示所見甚是乃貢楚克札布忽於是夜派兵往拏以致
尖木贊逃逸無踪實屬錯謬試思尖木贊既已如期投
至若果須設法擒拏亦不難於伊來營時就便拘縛今
尖木贊本屬恭順且既允其隨營自効復又派兵往拏
已不足以示信迨至尖木贊乘間逃逸緝捕無踪又不
足以示威貢楚克札布如此措置乖謬失信損威實屬
咎有應得著卽革職來京交軍機大臣會同刑部議罪

具奏與奎身爲統領於貢楚克札布逞臆妄拏之處未能攔阻又未據實叅奏亦有不合交軍機大臣會同行在兵部議處具奏仍著留於西寧與長齡那彥成將剿撫賊番事宜妥爲籌辦勉贖前愆至貢楚克札布派委何員往拏尖木贊及尖木贊如何乘間逃逸摺內未能聲敘明晰著興奎等詳細確查貢楚克札布原派何員尖木贊或係因透漏信息聞風潛逃或係因官兵到彼目擊驚逸或因捕捉情急竟有抗拒官兵情事俱不可不根究切實如尖木贊祇因震懾鼠匿卽當明白曉諭以伊本無不合貢楚克札布捕拏錯誤殊未允協仍可

令其來營効力倘竟有抗拒不法之事則是情同叛逆
惟應曉諭番衆將尖木贊縛獻治罪以示懲儆此一節
著與奎等詳細查明由五百里覆奏

嘉慶十二年八月十九日會同寧夏將軍與公奎
陝甘總督長公齡

奏爲攻破沙卜浪一族焚燬賊巢餘賊剿捕殆盡並收
撫各投誠番族事竊臣與奎前將攻剿沙卜浪大
族賊番並陸續投誠十二族緣由臣長齡臣那彥
成將馳抵軍營查明辦理情形並籌酌剿撫機宜
均已恭摺具

奏在案自初六日接仗後官兵分布四面山梁多放號
火縣亘二三十里聲勢聯絡緊逼賊巢初八日黎
明百祥格布舍吳廷剛一路官兵與蕭福祿游棟
雲等一路官兵分路進攻遙見林內有賊番潛匿
官兵先用鎗礮轟擊賊番不敢出林但於林內放
鎗抵死相持初九日百祥格布舍等卽挑帶奮勇
官兵分爲數路直衝入林隨攻隨進賊番一見官
兵衝入四散奔逃滾崖跌斃者不計其數婦女幼
小在林內樹枝自縊者甚多拋棄鍋帳什物襍沓
滿山林邊蓋有土房五百餘間卽係沙卜浪番族

巢穴官兵放火焚燒烟焰四起副將博勒忠阿自
右首山梁搶上搜殺前來又將沿途各溝口土房
全行燒燬時已日落火光燭天賊番喊哭之聲不
絕黑夜滾崖奔竄初十日早分兵於各溝內復加
窮搜見鎗斃賊屍縱橫滿地殫殫器具拋撒狼籍
餘賊踪跡俱向西北山內散竄十一日官兵又復
分路入山窮搜追至初果戎地方兩旁均係大山
密林溝內止有小路可通叅將張聯奎土司韓輝
宗等帶領撒拉爾回兵繞上山頂蕭福祿等帶領
官兵由溝內直入甫近林邊見有騎馬賊番二三

十人佔據山梁官兵一擁撲上鎗斃穿紅衣爲首
賊番一名落馬滾崖餘賊仍佔立不動遵守備劉
印景馮正朝帶領馬步官兵由北面抄截前來鎗
礮齊發賊番已形慌亂而張聯奎等帶領撒拉爾
回兵又從山頂撲壓而下賊番佔立不住俱向溝
底亂竄官兵直前趕殺砍斃數名生擒三十九名
人馬均有滾崖跌斃者餘賊無幾亡命潛逃收回
牛羊七八百隻均經分賞官兵暨撒拉爾回兵並
將各賊詳加審訊內有郡王納漢達爾濟札薩克
棍布多爾濟旗下蒙古十一人皆係四五年前或

攜眷投入或被掠入夥均給沙卜浪番賊牧放牛羊此次隨同打仗其餘皆係沙卜浪散番歷次作賊隨同打仗並訊出班珠爾貢格二名實係鎗斃以遊擊用之都司吳順之賊衆番質証確鑿又據供稱沙卜浪地方有六族番子居住一沙卜浪一納加一別舍一垛格共有男婦一千五六百人所居土房約有五六百間其餘俱住黑帳房前日打仗都是騎馬的雖有八九百人能打仗的只有二百多人因被官兵打死受傷滾崖的很多所以他們怕了盡皆四散奔逃我們實不知去向至番族

內蒙古甚多我們不知數目等語臣等訊明後卽

將鎗斃吳順之賊臠割其餘番賊均已正法梟示
至蒙古十一名旣經隨同打仗愈加可惡白不得
少從寬宥亦一併正法查沙卜浪賊番六族合聚
是以人數較多今經官兵屢次攻擊已破賊巢復
加痛勦餘賊無多俱已零星散竄各自逃生臣等
仍催兵再行入山將打散各賊尋踪搜捕務期擒
斬淨盡以示痛懲倘該番賊實在畏懼相率投誠
臣等卽當貸其一死早爲撤兵戢事臣等一路大
營連日又有若勒磨若勒乃阿烏亥什墩車阜隆

折卡賴賴太亥上剛咱下剛咱五都受干布祿淵
竹揣咱共十三族番目前來歸撫訊明均係未經
做賊之人_臣等俱經安插駐牧訖其麥受一族亦
有投誠之意隨後即可到來至尖木贊已逃往極
西南之竹壩林一帶老林藏匿查該番既非叛逆
卽無足重輕惟番性多疑此時若上緊查拏轉致
疑懼藏匿不出_臣等愚昧之見刻下暫從緩置或
可自行投出至現在大兵八千有餘不無糜費俟
將沙卜浪賊番搜捕數日卽將各營兵丁斟酌裁
撤再行陸續具奏謹

奏

嘉慶十二年九月初四日軍機大臣字寄奉

上諭興奎等奏官兵攻破沙卜浪番族焚燬賊巢剿捕殆盡並收撫投誠番族各情形一摺覽奏俱悉沙卜浪番族人數最多素稱兇悍今經官兵屢次攻擊殲擒番賊多名焚燬賊巢餘匪零星散竄是番族中之強橫者已大加懲創如果畏懼投誠即可曲從寬貰其餘各番衆族類繁多現在陸續乞降者接踵而至自俱已震懾軍威聞風膽落番境天氣早寒地勢險峻旣知畏法歛戢即可凱撤戡事亦不值徒疲兵力節經降旨指示興奎

等惟當酌量情形相機妥辦勿致稍稽時日至番賊內
有蒙古十一名隨同打仗殊屬可惡興奎等於擒獲後
審訊明確卽一併正法所辦甚是仍當通行曉諭青海
蒙古王公札薩克等以爾等自

世宗憲皇帝年間輸誠納款列入版圖世荷豢養生成至
優極渥大皇帝嘉爾恭順是以每遇番族擾及輒徵調
官兵驅逐懲辦不惜重帑皆因惠愛蒙古曲加保護爾
蒙古具有天良方感戴之不遑何至去而從賊乃此次
勦捕沙卜浪賊番竟有蒙古十一人在內訊係四五年
前攜眷投入或被掠入夥均給番賊牧放牛羊隨同打

仗殊出情理之外實屬罪不容誅該王公札薩克等失
察之咎無可解免本應將該犯等解至蒙古地界正法
梟示並將該王公札薩克等予以懲處俾知儆戒今蒙
大皇帝格外施恩俯念爾等係糊塗蒙古且從賊之犯
必係爾等屬下之尤爲不肖者已將該犯等訊明後卽
在番地正法以全爾等顏面並將爾等失察罪愆從寬
免議爾等惟當知感知愧嚴行管束屬下人等務各安
分守法長此蒙恩倘復有滋事不法情事必當分別治
罪斷不能再邀寬恕其各凜慎毋忽又據摺內稱尖木
贊逃往極西南之竹林壩一帶老林藏匿等語前經降

旨諭令查明尖木贊如何逃逸情形據實具奏今興奎等既已探明該番目踪蹟卽當曉諭降番令其將伊獻出以憑覈辦至此次勦辦賊番興奎於貢楚克札布妄拏尖木贊之處未能阻止又不叅奏現有應得之咎長齡那彥成俱甫經到彼均無庸加以獎敘其帶兵各員如百祥格布舍蕭福祿以及各將弁等如有實在出力者興奎等當於撤兵竣事後覈其勞績據實保奏候朕施恩但不可稍有冒濫

嘉慶十二年八月二十五日會同寧夏將軍興公

奎陝甘總督長公齡

奏爲官兵搜捕沙卜浪餘賊並該番賊畏懼乞降先行酌撤官兵事竊臣等前將攻破沙卜浪番族焚燬賊巢收撫投誠番族各情形於十九日恭摺具

奏在案該番賊等被官兵痛剿之後三五零星四處竄匿臣等公同商議必須乘此賊勢窮蹙之際更當加緊勦辦因卽嚴催提督百祥寧夏副都統格布舍督同總兵吳廷剛副將吳亨衍都司馬進馬成等帶兵自南面搜捕又令總兵蕭福祿游棟雲遊擊朱福壽熊鳴謙都司馬正元楊印花等帶兵自北面搜捕以期兩面夾擊十六日蕭福祿等一路

官兵由初果戎地方分兵入林旋搜旋進於林木
深處遇有番賊二十餘人該番賊一見官兵不敢
抵拒亡命奔逃官兵直前砍殺殲斃五人生擒十
九名訊明均係沙卜浪散番當卽概行正法割取
首級呈繳次日仍催兵窮搜行至葉什冲堽口見
密林中露有烟火官兵一齊衝入於土窟內搜獲
男婦四人均係卜沙浪散番卽行正法二十一日
沙卜浪番目桑爾吉搬第策楞三住布等三人懇
求葉什冲寺喇嘛帶領至營懇請投誠卽一面知
會百祥蕭福祿各路暫停勦捕臣等仍將桑爾吉

等嚴加駁斥不准投誠據該番目又復苦求但請
饒命查其情詞實形懼怕因准其見面卽詢據桑
爾吉等供稱係沙卜浪頭目我們沙卜浪係六族
合居人多勢衆難以管束平素原有做賊的人連
日與官兵打仗均係做賊的上前被官兵殺死的
甚多還有三箇大頭目也被官兵殺了我們實在
害怕纔央求葉什冲寺喇嘛帶領我們投誠只求
饒我們性命以後再不敢滋事了語畢伏地碰頭
痛哭不止察其情狀出於至誠惟野番性類犬羊
反覆無定若不乘此窮蹙之時多爲留難恐該番

見宥罪甚易遂敢輕視之心臣等當卽諭以爾等不思安分守法屢肆搶掠已屬法所難容及官兵前來剿捕爾等竟敢聚眾抵敵是以

大皇帝震怒必欲將爾等斬盡根株不留一人今爾等既稱所有做賊之人在前抗拒均被官兵殲斃爾等十分畏懼真心投首但爾等罪惡既大難以遽加寬宥惟有恭請

大皇帝諭旨或者

大皇帝肯施

天恩爾等尙有一線生路亦未可定但聞爾族中平素敬

信之喇嘛諾爾布闔族大小頭目俱聽信他你們
投誠爲何不同他出來如今必須叫諾爾布來營
同你們衆人頂經發誓方爲可信據供喇嘛諾爾
布原說官兵到來不可抗拒自有生路若要抗拒
斷難保全我們一時糊塗未聽他的話以致多被
官兵殺死如今我們後悔也遲了回去求他一同
來營情願頂經發誓再不敢犯法等語當卽令其
前往傳喚惟聞循化所屬之季屯吳屯脫屯上季
屯下季屯五屯地方土民與沙卜浪番族住居相
近平日俱有嫌隙今見官兵勦捕遂乘勢搶掠該

番族田禾牲畜等物又聞該番族以官兵勦捕本
係王法當然該土民何得乘急肆搶竟有日後必
圖報復之語若不及早辦理將來必起事端臣等
現已嚴飭循化廳並該營都司等將該土民所搶
贓物查明照數交出以備將來給還並諭知桑爾
吉等

天朝待爾等番民與蒙古土民均係一視同仁爾等搶掠
蒙古

天朝斷不能容今土民搶掠爾等牲畜禾苗亦必代爾追
贓給主並無偏護桑爾吉等聞聽感激涕零口稱

大皇帝卽是天如此大公辦事我們番衆有何不怕不服呢再三叩謝而去想日內該番目必能將諾爾布傳喚到營彼時再當宣播

皇仁貸其滅族之罪令其頂經發誓以堅其歸順之心連

日又有麥受朶冬羅可溜石塞宣札才爾隆鮮咱

有若哇永隆囊拉查納黑他爾迭等十二族番目

陸續來營投誠_臣等均經賞給告示安插駐牧訖

再查從前辦理番案從未深入番地於野番性情

未能深悉今_臣等細心體察番子敬信喇嘛較蒙

古尤甚從前屢辦番案所用爲線索者不過在熟

番中揀擇通曉漢語之人既無根底其中多不可深信且身家既輕用之亦不得把握竟不如查明各番地大寺喇嘛數人示之懷柔妥爲駕馭責令勸諭各生番宣布

天朝威德使無知之衆漸通人性庶幾可以柔化將來如果出力臣等再爲奏祈

天恩或

賞給廟宇之名或

賞名號以示鼓勵此次臣長齡臣那彥成自西寧起程卽將平番縣喇嘛延嘉呼圖克圖那旺丹津甲木錯

並其弟喇嘛丹津林沁又喇嘛羅布藏等帶來軍
營據延嘉呼圖克圖稱伊從前在京曾受

大皇帝天恩嗣因腿疾回甘未能圖報今值野番滋事正
可稍効微勞等語連日各族番衆均係聽從該呼
圖克圖等喚諭而來是以一心歸命絕無疑慮將
來若用喇嘛等撫馭番衆似屬事半功倍可得要
領現在已令延嘉呼圖克圖等至各寺傳喚爲首
喇嘛等前來面見後再行具

奏至刻下各族均已投誠官兵即可漸次減撤臣等商
酌先將寧夏滿營官兵五百名並撒拉爾回兵五

百名洮岷兵一千名先行撤剿其餘官兵俟數日
內辦理完竣卽行全撤至日內沙卜浪大喇嘛諾
爾布與尖木贊投出卽可撤兵肅事應遵照前奉
諭旨由五百馳奏告成謹

奏

嘉慶十二年八月二十五日會同寧夏將軍興公
奎陝甘總督長公齡

奏本月十九日尖木贊之姪札什來營投首據稱我叔
子尖木贊原係納糧之番受

天朝厚恩歷年各位大人時常傳喚當差今年五月內聽

得

大皇帝大兵勦捕做賊生番我叔子帶兵來出力打仗又
出烏拉運糧實未敢叛逆各等語伏查臣等前於
十四日業將尖木贊之事

奏明在案今其姪札什投首自係尖木贊尙自疑懼令
其姪前來試探臣等當卽好言撫慰作爲有意無
意令其先往找尋去訖計日內尖木贊必有消息
如果尖木贊肯出投首則此事收局更爲全善謹
奏奉

硃批覽

嘉慶十二年九月初九日軍機大臣字寄奉

上諭興奎等奏官兵搜捕沙卜浪餘匪並番衆畏懼乞降情形一摺賊番搶劫滋事擾及內地邊民節經官兵攻擊殲獲甚多其沙卜浪一族人數最衆在番境中尤爲强悍今官兵疊次勦捕先後生擒擊斃賊犯多名奪獲牲畜數萬焚燬賊巢實已痛加懲創該番衆震懾軍威番目桑爾吉等畏懼投誠詣營乞命自應寬其一線施恩收撫其應行先撤官兵卽照所請撤回免致糜費至奪獲牛羊牲畜著先行酌量賞還蒙古並諭以該賊番等所搶蒙古牛羊諒自不止此數但旣經被劫之後除

食用倒斃外所剩無幾今蒙大皇帝施恩賞給爾等當
領回孳生游牧近因爾蒙古不能自固藩籬以致番賊
屢經滋擾現在調集官兵痛加攻剿不惜重費帑金皆
係爲保護蒙古起見詎爾等屬下人等竟有投往番境
從賊抗拒者實出情理之外此次姑從寬貰免治爾等
失察之罪嗣後惟應加意管束振作自強以期永承恩
眷並諭以此次番衆頂經發誓十分畏服不致復有他
慮惟是番衆族類繁多難保無一二不肖匪徒乘間竄
擾爾蒙古當隨時自行驅逐卽如內地民人良莠不一
亦難保無乘間盜竊情事不能因番族此次被剿帖服

之後遽爾稍涉大意也其出力官兵並喇嘛撒拉爾回兵均著將所獲牛羊酌量賞給撒拉爾回兵此時如已撤回並著傳喚祇領至摺內稱番衆敬信喇嘛較蒙古爲甚現在擬令延嘉呼圖克圖等前往喚諭等語所奏自屬可行那彥成等當飭令延嘉呼圖克圖妥爲曉諭該喇嘛如果出力圖報事竣後卽著據實保奏或錫以嘉名或加之賞資用示獎勵惟所稱循化所屬之季屯等五屯地方土民與沙卜浪番族居住相近平日俱有嫌隙今見官兵勦捕隨乘勢搶掠該番族田禾牲畜等物現已嚴劄循化廳等令將該土民所搶贓物查明照

數交出以備將來還給等語此則不必土民因素被番族欺凌乘勢搶劫報復其所搶牛羊牲畜即使嚴飭追還亦斷不能如數或該番因所得不償所失復行稟求又將如何補給此時如業已追還則已如尙未追出卽無庸紛紛查追致滋煩擾興奎等惟當嚴飭土民毋再攘奪番族牲畜物件並曉諭番族以爾等旣已投誠卽與內地民人無異大皇帝一視同仁從無歧視嗣後務當安分守法各安生業倘有土民擾及必當嚴辦此則番衆土民俱各感激歛戢不致再滋事端至番目尖木贊之姪旣已來營投首自係尖木贊遣令前來試探與

奏等當妥爲撫諭令其迅速投出再行全撤大兵俾邊境永臻寧謐更爲完善其另摺保奏各員已令軍機處存記俟大兵全撤奏到時再行降旨

謹按嘉慶十二年十月初五日奏內

奏前因循化所屬之五屯土民乘勢搶掠沙卜浪番族牲畜田禾當經劄飭該廳文武查辦並於摺內聲明具

奏在案茲經查明當日官兵勦辦沙卜浪番族時五屯土民因與沙卜浪素有仇隙告請隨同打仗總兵蕭福祿允其前往迫將賊番勦散之後田禾牲畜

拋棄滿山該土民等卽乘勢收取是以臣等復派
令蕭福祿副將吳亨衍前赴該處傳齊番土各民
面加曉諭今已准令該番投誠嗣後毋許再起爭
端該土民等所獲牲畜均已食用惟田禾尙存情
願交還而該番等自以有罪之人蒙

天朝准其投誠不加剿除已屬萬幸斷不敢再生妄想索
還失物再四推辭該總兵等見該番如此恭順酌
加賞資並曉諭土民免其追還各物仍令土民與
番民同在一處頂經發誓嗣後彼此永不相仇番
土各民莫不歡欣感激而去謹

奏奉

硃批覽

那文毅公西寧辦事大臣奏議卷十五